

9. april 2014

UPA 2014/38
Nikolaj Jeremiassen

Inuussutissarsiutigiginagu aalisarsinnaaneq piniarsinnaanerlu aatsaat ukiut pingasut Kalaallit Nunaanni najugaqareersimagaanni pisinnaatitaaffinngornissaa siunertaralugu Naalackersuisut UKA14-mut Aalisarneq pillugu inatsisartut inatsisaat nr. 18, 31. oktober 1996-imeersup kiisalu Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersup allanngortinnissaannut siunnersuusioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Mathæussen, Siumut)

Inatsisitigut sinaakkutit Inatsisartuni nalilersorneqaqqullugit saqqummiussisoqaraangat Siumumi tunuarsimaarutigineqarneq ajorpoq, pissutsimmi allangorartuupput taamaatumillu inatsisit aamma naleqqussarneqartuartaussaallutik, Inatsisartunut ilaasortap Lars P. Mathæussen-ip siunnersuutigai inatsisitigut allamiut nunatsinnut suliarortut piniarnermi aalisarnermilu minnerpaamik ukiuni pingasuni nunatsinniissimagunik aatsaat allagartamik pisinnaatitaasalernissaat.

Siunnersuuteqartoq isumaqarpoq tamanna killilersorneqartariaqartoq piujuartitsinissaq sillimaniarnerlu eqqarsaatigalugit, aamma siunnersuuteqartoq sanillersuussivoq nunani allani imaaliallaannaq piniarsinnaallutillu aalisarsinnaannginnerat assersuutigalugu.

Aalisarneq pillugu Inatsisartut inatsisaat nr. 18, 31. oktober 1996-imeersaq naapertorlugu nunatsinni aalisarsinnaassagaanni ukiuni marlunni najugaqareersimanissaq piumasaqaa-taavoq inatsimmi nr. 18, 31. oktober 1996-imeersumi § 8 malillugu.

Tamannali sukateriffigineqassasoq siunnersuuteqartoq saqqummiussaqqarpoq, inatsimmi allannguummik kingusinnerusukkut suliaqartoqarsimanersoq, ilanngullugu Naalackersuis-unut apeqqutigissavarput, isumaqaratta aalisarnermi killissarititaasoq malinneqarpat ukiut marluk atuuttussaasut tamannali nalilersorneqassappat ataatsimiititaliaq susassaqqartoq nalilersuinissami periarfissittariaqarpoq, ullumikkut killissarititaasut ukiunut marlunnut atuuttussat sivitsorneqarnissaat ilumut pisariaqarnerseq, tamatumunngattaq ilanngullugu soqutigaarput immikkut akuersissutinik ukiut killissarititaasut avaqqullugit tunniussisoqar-tarsimappat tamatumani nakkutillineq naamattumik ingerlanneqarnerseq paaserusullugu.

Taamatutaaq piniarneq aallaaniarnerlu pillugit inatsisartut inatsisaat nr. 12, 29. oktober 1999-imeersup allanngortinnissaanut Naalackersuisut siunnersuusioqqullugit peqqune-

qassasut aalajangiiffisassatut siunnersuutigineqarpoq, tunngavilersuutit qulaani saqqummiunneqartut aallaavigalugit.

Inatsimmi nr. 12, 29. oktober 1999-imeersumi § 5 malillugu ukiut marluk nunatsinniis-simagunik allagartartaartoqarsinnaasoq aalajangersarneqarsimavoq tamannalu ukiumik ataatsimik sivitsuinissamik siunnersuutikkut sukaterneqassasoq siunnersuutaavoq.

Qulaani inatsisikkut periarfissaareersoq sukateriffigineqaqqissanersoq nalilersorluarneqaq-qullugu Siumut isumaqarpoq, ataatsimiititaliamut sussassaqaqartumut inatsisit marluk ataatsimut allangortinneqassasut siunnersuutaasut nalilersorluarneqassasut.

Ilaatigut Aalisarnermut Piniarnermut Nunalerinermullu Ataatsimiititaliamut ingerlatinneqar-neratigut tusarniagassat peqqissaartumik suleqatigalugit nalilersorneqareerpat ataatsimiiti-taliamit saqqummiusisoqaqullugu.

Taamatut Siumumiit oqaaseqarluta Aalisarnermut Piniarnermut Nunalerinermullu Ataatsi-miititaliamut innersuupparput.